

六祖壇經

惠昕母本的還原本

林崇安編校

2018.05

【說明】

一、惠昕系六祖壇經的形成：

〈法海前期本〉(678 頃)→〈法海後期本〉(714 頃)→〈志道抄本〉(720 頃)
→彼岸→悟真→圓會→〈惠昕本〉(787)→惠昕系四本：〈真福寺本〉(1012)、〈大乘寺本〉(1116)、〈天寧寺本〉(1116)、〈興聖寺本〉(1153)。

二、〈惠昕母本〉(787)是由〈真福寺本〉、〈大乘寺本〉、〈天寧寺本〉、〈興聖寺本〉四本的共通部分還原而得。惠昕本，指唐惠昕於貞元三年(787)分卷分門的初本，是四本的母本，也就是說，這四本是從惠昕母本直接或間接抄出，抄出時有錯字、衍字、漏字，其中的〈興聖寺本〉又有不少的增改而異於其他三本。

三、由於時代接近，從〈惠昕母本〉(787)也可以還原出早期的〈志道抄本〉(720 頃)。這些還原本可作參考之用。

四、經文中，分出段落並編號，並重新統一品名，這是為了便於惠昕、契嵩、敦煌諸系本間的相互比對。

〈惠昕母本〉

【經名】

韶州曹溪山六祖壇經（簡稱六祖壇經）

【一眾請說法品】

一、眾請說法門

【A1】大師初從南海上至曹溪。韶州刺史韋璩等，請於大梵寺講堂中為眾開緣，授無相戒，說摩訶般若波羅蜜法。

大師是日，說頓教法，直了見性無疑；

普告僧俗，令言下各悟本心，現成佛道。

座下僧尼、道俗一千餘人，刺史、官僚等三十餘人，儒宗學士三十餘人，同請大師說是法門。

刺史韋璩令門人法海抄錄流行，傳示後代。若承此宗旨，學道者遞相傳授，有所依憑耳。

【二悟法傳衣品】

二、悟法傳衣門

【A2】爾時，大師既昇座已，而示眾言：善知識！總淨心念摩訶般若波羅蜜。

【B1】大師良久不語，自淨其心，忽然告言：善知識！菩提自性本來清淨，但用此心，直了成佛。

大師言：善知識！且聽某甲行由，得法事意。某甲嚴父，本貫范陽，左降流于嶺南作新州百姓。

此身不幸，父少早亡。老母孤遺，移來南海。艱辛貧乏，於市賣柴。時有一客買柴，便令送至官店，客收柴去。某甲得錢，卻出門外，見一客讀《金剛經》。

【B2】某甲一聞，心便開悟，遂問客言：「從何所來，持此經典？」

客云：「我從蘄州黃梅縣東馮茂山來，其山是第五祖弘忍大師在彼主化，門人一千有餘。我到彼山禮拜，聽受此經，大師常勸僧俗，但持《金剛經》，即自見性，直了成佛。」

某甲聞說，宿昔有緣，乃蒙一客取銀十兩與某甲，令充老母衣糧，教某甲便往黃梅禮拜五祖。某甲安置母畢，即便辭親，不經三十餘日，便至黃梅，禮拜五祖。

【B3】問曰：「汝何方人，來到此山中禮拜？今向吾邊，欲求何物？」

某甲對云：「弟子是嶺南人，新州百姓，遠來禮師，唯求作佛，不求餘物。」

五祖責曰：「汝是嶺南人，又是獼猴，若為堪作佛？」

某甲言：「人雖有南北，佛性本無南北；獼猴身與和尚不同，佛性有何差別？」

【B4】大師更欲共某甲久語，且見徒眾總在身邊，乃令某甲隨眾作務。

某甲啟和尚言：「弟子自心常生智慧，不離自性即是福田，未審和尚教作何務？」

五祖言：「這獼猴根性大利。汝更勿言，且去後院。」有一行者，差某甲破柴踏碓八箇餘月。

五祖一日忽見某甲言：「吾思汝之明見，恐有惡人害汝，遂不與言，汝知之不？」

某甲言：「弟子亦知師意，不敢行至堂前，令眾人不覺。」

【B5】五祖一日喚諸門人總來：

「吾向汝說，世人生死事大，汝等終日供養，只求福田，不求出離生死苦海。汝自性迷，福何可救？汝等各去後院，自看智慧，取自本心般若之性，各作一偈，來呈吾看。若悟大意，付汝衣法，為第六代祖。火急便作，不得遲滯！思量即不中用。見性之人，言下須見，若輪刀上陣一般。」

眾得處分，來至後院，遞相調言：「我等眾人，不須呈心，用意作偈，將呈和尚，有何所益？神秀上座見為教授師，必是他得。我輩謾作偈誦，枉用心力。」

諸人聞語，各自息心，咸言：「我等迺後依止神秀即得，何煩作偈？」

【B7】神秀思惟：「諸人不呈偈者，為我與他為教授師。我須作偈將呈和尚，若不呈偈，和尚如何知我心中見解深淺？我呈偈意即善，求佛覓祖即惡，却同凡心奪其聖位無別。若不呈偈，終不得法。大難！大難！」

【B6】五祖堂前，有步廊三間，擬請供奉盧珍畫楞伽變相，及五祖血脈圖，流傳供養。

【B7'】神秀作偈成已，數度欲呈，行至堂前，心中恍惚，遍體汗流，擬呈不得。前後經過四日，一十三度呈偈不得。

秀乃思惟：「不如向廊下書著彼偈，和尚看見，忽若道好，即出頂禮，云是秀作；若道不堪，枉向山中數年受人禮拜，更修何道！」

言訖，夜至三更，不使人知，自執燈燭，於南廊中間壁上，書《無相偈》，呈心所見，神秀偈曰：

身是菩提樹，

心如明鏡臺，

時時勤拂拭，
莫使染塵埃。

秀書偈了，便卻歸房，人總不知。

神秀思惟，五祖明日見偈歡喜，出見和尚，即言秀作；若言不堪，自是我迷，宿業障重，不合得法，聖意難測。房中思想，坐臥不安，直至五更。

【B8】五祖即知神秀入門未得，不見自性，喫粥了便即天明。五祖方便喚盧供奉來，擬向南廊畫五代血脈供養。

五祖忽見其偈，報言：「供奉却不畫也，輒奉十千，勞供奉遠來。《金剛經》云：凡所有相，皆是虛妄。不如留此偈，令迷人誦。依此偈修，免墮三惡，依此修行，有大利益。」

五祖喚門人燒香偈前，令凡人見，生敬重心。

「汝等盡須誦取。悟此偈者，即得見性，依此修行，必不墮落。」

門人盡誦，皆歎善哉！

【B9】五祖三更，喚秀入堂，問：「是汝作此偈不？若是汝作，應得吾法。」

秀言：「罪過！實是秀作。亦不求祖位，望和尚慈悲，看弟子心中有少智慧不？」

五祖言：「汝作此偈，未見本性，只到門上，未離凡愚。依此修行，即不墮落。如此見解，覓無上菩提，即不可得。無上菩提須得言下識自本心，見自本性，不生不滅。

於一切時中，念念自見，萬法無滯，一真一切真，萬境自如，如如之心，即是真實。若如是見者，即是無上菩提之自性也。」

五祖言：「汝且去一二日思惟，更作一偈，將來呈吾看，汝偈若得入門，見自本性，付汝衣法。吾不惜法，汝見自遲。」

秀乃作禮便出。又經數日，作偈不成，心中恍惚，神思不安，猶如夢中，行坐不樂。

【B10】復經兩日，有一童子於碓坊過，唱誦其偈。

某甲一聞，便知此偈未見本性。某甲未蒙教授，早識大意，遂問童子曰：「誦者是何偈？」

童子曰：「爾這獼猴！不知大師言：世人生死事大，欲得傳付衣法。令門人作偈來看。若悟大意，即付衣鉢，為第六祖。神秀上座於南廊壁上，書《無相偈》。五祖令門人盡誦此偈，若得悟者，即見自性成佛；依此修行，即不墮落。」

某甲言：「上人！我在此踏碓八箇餘月，未曾行到堂。望上人引至偈前禮拜，亦要誦取，結來生緣，同生佛地。」

【B11】童子便引某甲至南廊偈前禮拜。某甲為不識字，請一上人為讀。某甲得聞，願生佛會。

時有江州別駕姓張名日用，便高聲讀。某甲一聞，即識大意，即言：「某甲亦有一偈，望別駕書安壁上。」

別駕言：「獼猴汝亦作偈，其事希有。」

某甲啟別駕言：「若學無上菩提，不得輕於初學。俗諺云：下下人有上上智，上上人有勿意智。若輕人，即有無量無邊罪。」

張日用言：「汝但誦偈，吾為汝書，安西壁上。汝若得法，先須度吾，勿忘此言。」

某甲偈曰：

菩提本無樹，
明鏡亦非臺，
本來無一物，

何處有塵埃？

說此偈已，僧俗總驚。山中徒眾無不嗟訝，各相謂言：「奇哉！不得以貌取人，何得多時使他肉身菩薩！」

【B12】五祖見眾人盡怪，恐人損他，向後無人傳法，遂便混破，向眾人言：「此偈亦未見性，云何讚歎？」

眾便息心，皆言未了，各自散歸，更不讚歎。

【B13】五祖其夜三更，喚某甲至堂內，以袈裟遮圍，不令人見，為某甲說《金剛經》，恰至「應無所住，而生其心」，言下便悟，一切萬法，不離自性。

某甲啟言：和尚！何期自性本自清淨，何期自性本不生滅，何期自性本自具足，何期自性無動無搖，能生萬法？

五祖知悟本性，乃報某甲言：「不識本心，學法無益。若言下識自本心，見自本性，即名丈夫、天人師、佛。」

【B14】三更受法，人盡不知。便傳頓教及衣鉢云：汝為第六代祖，善自護念，廣度迷人。將衣為信稟，代代相承；法即心傳心，皆令自悟自解。自古佛佛惟傳本體，師師默付本心，令汝自見自悟。

五祖言：「自古傳法，命似懸絲。若住此間，有人害汝，汝須速去！」

某甲言：「某甲是南中人，久不知此山路，如何出得江口？」

五祖言：「汝不須憂，吾自送汝。」

某甲領得衣鉢，三更便發歸南。

五祖相送，直至九江驛邊。

有一隻船子，五祖令某甲上船，五祖把櫓自搖。

某甲言：「請和尚坐，弟子合搖櫓。」

五祖言：「只合吾渡汝，不可汝却度吾，無有是處。」

某甲言：「弟子迷時，和尚須度。今既已悟，過江搖櫓，合是弟子度。度名雖一，用處不同。某甲生在邊方，語又不正，蒙師教旨付法，今已得悟，即合自性自度。」

五祖言：「如是如是，但依此見，迺後佛法大行矣。汝去後一年，吾即前逝。」

五祖言：「汝今好去努力向南，五年佛法難起。他後行化，善誘迷人，若得心開，與吾無別。」

【B15】辭違已了，便發向南。

兩月中間，至大庾嶺，不知逐後數十人來，欲趁某甲，奪衣取法，來至半路，盡總却避。

唯一僧，姓陳，名惠明，先是四品將軍，性行麤惡，直至大庾嶺頭，趁及某甲。便還衣鉢，又不肯取，言：「我欲求法，不要其衣。」

某甲即於嶺頭，便傳正法。惠明聞說，言下心開。某甲却令向北接人。

某甲後至曹溪，又被惡人尋逐，乃於四會縣避難。經五年，常在獵中。雖在獵中，每與獵人說法。

【B16】某甲東山得法，辛苦受盡，命似懸絲。今日大眾同會得聞，乃是過去千生，曾供養諸佛，方始得聞無上自性頓教。某甲與使君及官僚道俗，有累劫之因。教是先代聖傳，不是某甲自智。願聞先聖教旨，各須淨心，聞了各自除疑，如先代聖人無別。

【C1'】大師言：善知識！菩提般若之智，世人本自有之。只緣心迷，不能自悟，須求大善知識示道。愚人、智人，佛性本無差別，只緣迷悟不同，所以有愚、有智也。

【三定慧一體品】

三、為時眾說定慧門

【G1】師言：善知識！我此法門，以定慧為本。大眾勿迷，言定慧別。定慧一體，不是二。定是慧體，慧是定用。即慧之時定在慧，即定之時慧在定。若識此義，即是定慧等學。諸學道人，莫言：「先定發慧，先慧發定，定慧各別。」作此見者，法即有二相：口說善、心中不善，定慧不等。心口俱善，內外一種，定慧即等。自悟修行，不在於諍。若諍先後，即同迷人。不斷勝負，卻增法我，不離四相。

【G2】善知識！一行三昧者，於一切處，行、住、坐、臥，常行一直心是也。《淨名經》云：「直心是道場，直心是淨土。」莫心行諛曲，口但說直、口說一行三昧，不行直心。但行直心，於一切法，無有執著。

【G3】迷人著法相，執一行三昧，直言：「坐不動是」，早已執迷著。「除妄不起心，即是一行三昧」，此法若同無情，却是障道因緣。

善知識！道須通流，何以卻滯？心不住法，道即通流。心若住法名為自縛。

若言坐不動是，只如舍利弗宴坐林中，不合被維摩詰呵。

善知識！又見有人教坐，看心看淨，不動不起，從此置功。迷人不會，便執成顛，即有數百人，如是相教，故知大錯。

【G4】善知識！定、慧猶如何等？猶如燈、光。有燈即光，無燈不光，燈是光之體，光是燈之用，名雖有二，體本同一。此定、慧法，亦復如是。

善知識！本來正教無有頓漸，人性自有利鈍。迷人漸契，悟人頓修。自識本心，自見本性，即無差別。所以立頓漸之假名。

【G5】善知識！我此法門，從上已來，先立無念為宗，無相為體，無住為本。

【G6】何名無相？於相而離相。

【G7】無念者，於念而不念。

【G8】無住者，人之本性，於世間善惡好醜，乃至冤之與親，言語觸刺欺諍之時，並將為空，不思酬害，念念之中，不思前境。若前念、今念、後念，念念相續不斷，名為繫縛。於諸法上，念念不住，即無縛也。是以無住為本。

【G9】善知識！外離一切相，名為無相。能離即法體清淨，是以無相為體。

【G10】善知識！於諸境上，心若離染，萬境常寂，念上常離諸境，不於境上生心。

莫百物不思，念盡除却即死，別處受生。

學道者！莫不識法意，自錯猶可，更勸他人，自迷不見，又謗佛經。所以立無念為宗。

善知識！云何立無念為宗？只緣口說，不見本性，迷人於境上有念，念上便起邪見，一切塵勞妄想，從此而生。自性本無一法可得，若有所得，妄說禍福，即是塵勞邪見。故此法門立無念為宗。

善知識！無者，無何事？念者，念何物？無者，無二相，無諸塵勞之心。念者，念真如本性。真如即是念之體，念是真如之用。真如自性起念，非眼、耳、鼻、舌能。真如有性，所以起念。真如若無，眼、耳、色、聲當時即壞。

善知識！真如自性起念，六根雖見聞覺知，不染萬境，真性而常自在。外能分別諸色相，內於第一義而不動。

【G14】善知識！此門坐禪，亦不看心，亦不看淨，亦不言不動。

若言看心，心元是妄，知心如幻，故無所看也。

若言看淨，人性本淨，由妄念故，蓋覆真如，但無妄想，性自清淨。起心看淨，却生淨妄，妄無處所，看者是妄。淨無形相，却立淨相，言是工夫，作此見者，障自本性，卻被淨縛。

善知識！若修不動者，但見一切人時，不見人之是非、善惡、過患，即是自性不動。

善知識！迷人身雖不動，開口便說他人是非、長短、好惡，與道違背也。若看心看淨者，却障道也。

【四教授坐禪品】

四、教授坐禪門

【G11】師言：善知識！何名坐禪？此法門中，無障無礙，外於一切善惡境界，心念不起，名為坐；內見自性不亂，名為禪。

【G12】善知識！何名禪定？外離相為禪，內不亂為定。外若著相，內心即亂。外若離相，心即不亂。本性自淨自定，只為見境、思境即亂。若見諸境心不亂者，是真定也。善知識！外離相即禪，內不亂即定也。外禪內定，是為真定。

【G13】《淨名經》云：豁然還得本心，《菩薩戒經》云：「我本元自性清淨。」

【G14】善知識！於念念中，自見本性清淨，自修自行自成佛道。

【五傳戒歸依品】

五、說傳香懺悔發願門

【H1】師言：善知識！某甲一會在此，皆共有緣，今各胡跪。傳自性五分法身香：

一調戒香，即自心中，無非、無惡、無嫉無妬、無貪瞋、無劫害，名曰戒香。

二定香，即睹諸善惡境相，自心不亂即是也。

三慧香者，自心無癡，常以智慧觀照自性，不造諸惡。雖修眾善，心不執著。畏上愛下，矜孤恤貧，此名慧香。

四解脫香，即自心無所攀緣，不思善，不思惡，自在無礙，名解脫香。

五解脫知見香者，自心既無攀緣善惡，不可沉空守寂，即須廣學多聞，識自本心，達諸佛理，言滿天下無口過，行滿天下無怨惡，和光接物，無我無人，直至菩提，真性不易，名解脫知見香。

善知識！此香各自內薰，莫於外覓。

【H2】今與善知識無相懺悔，滅除心中河沙積劫之罪。

善知識！前念後念及今念，念念不被愚迷染，從前惡念一時除，自性自除真懺悔。前念後念及今念，念念不被誑妄染，除却從前憍慢心，永斷名為自性懺。前念後念及今念，念念不被疽妬染，除却從前疽妬心，永斷名為自性懺。已上三遍唱。

【H3】原缺

【I1】師言：今既懺悔已，一時逐某甲道，與善知識發四弘誓願。

各須用心正聽：

自心邪迷眾生誓願度，自心煩惱無邊誓願斷，自性法門無盡誓願學，無上自性佛道誓願成！已上三遍唱。

【I2】師言：善知識！大家豈不道眾生無邊誓願度，怎麼道？莫道是某甲度。

善知識！心中眾生，所謂邪迷心、誑妄心、不善心、疽妬心、惡毒心，如是心者，盡是眾生。各須自性自度，是名真度。何名自性自度？即自心中邪見、煩惱、愚痴眾生，將正見度。既有正見，使般若智，打破愚痴、迷妄眾生，各各自度。邪來正度，迷來悟度，愚來智度，惡來善度，如是度者，名為真度。

【I3】又煩惱無邊誓願斷，自性除卻虛妄思想心是也。

【I4】又法門無邊誓願學，須自見性，常行其善法，是名真學。

【I5】又佛道無邊誓願成，即常須下心，行於普敬，離迷離覺，當生般若，除真除妄，即見佛性，即言下佛道成。常念修行，是願力法。

【J1】師言：善知識！今發四弘願了，更與善知識授無相三歸依：善知識！歸依覺，二足尊。歸依正，離欲尊。歸依淨，眾中尊。從今日去，稱覺為師，更莫歸依邪迷外道。以自性三寶，常自證明！

【J2】某甲勸善知識歸依自性三寶：佛者覺也。法者，正也。僧者，淨也。

【J3】自心歸依覺，邪迷不生，少欲知足，能離財色，名二足尊。

【J4】自心歸依正，念念無邪見，以無邪見故，即無人我、貢高、貪愛、執著，名離欲尊。

【J5】自心歸依淨，一切塵勞、妄念雖在自性，皆不染著，名眾中尊。

【J6】若修此行，是自歸依。凡夫不會，從日至日，受三歸戒。若言歸佛，佛在何處？若不見佛，憑何所歸？言却成妄。

善知識！各自觀察，莫錯用心。經文分明言自歸依佛，不言歸依他佛。自性不歸，無所歸處。

今既自悟，各須歸依自心三寶，內調心性，外敬他人，是自歸也。

六、說一體三身佛相門

【K1】師言：善知識！各各志心，某甲與說一體三身自性佛。令善知識見三身了然，自悟自性，總隨某甲道：

於自色身，歸依清淨法身佛。

於自色身，歸依千百億化身佛。

於自色身，歸依圓滿報身佛。

已上三遍唱。

【K2】善知識！色身是舍宅，不可言歸，向者三身在自性中，世人總有，為自心迷，不見內性，外覓三身如來，不見自身中有三世佛。

善知識聽說！令善知識於自身中，見自性有三世佛。此三身佛從自性生，不從外得。

【K3】何名清淨法身？世人性本清淨，萬法從自性生：思量一切惡事，即生惡行；思量一切善事，即生善行，如是諸法，在自性中。如天常清，日月光明，為浮雲蓋覆，上明下暗，忽遇風吹，眾雲散盡，上下俱明，萬象皆現。世人性常浮游，如彼雲天，亦復如是。

善知識！智如日，慧如月，智慧常明。於外著境，被妄念浮雲蓋覆，自性不得明朗。若遇知識聞真正法，自除迷妄，內外明徹，於自性中萬法皆現。見性之人，亦復如是。此名清淨法身佛。

善知識！自心歸依自性，是歸依真佛。

自歸依者，除却自性不善心、疽妬心、憍誑心、吾我心、誑妄心、輕人心、慢他心、邪見心、貢高心及一切時中不善行，常自見己過，不說他人好惡，是自歸依。常須下心，行於普敬，即是見性通達，更無滯礙，是自歸依。

【K4】何名千百億化身？若不思，萬法性本如空。一念思量，名為變化：思量惡事化為地獄，思量善事化為天堂，毒害化為龍蛇，慈悲化為菩薩，智慧化為上界，愚癡化為下方。自性變化甚多，迷人不能省覺，念念起惡，常行惡道。迴一念善，智慧即生，此是自性化身佛。

【K5】何名圓滿報身？譬如一燈能除千年闇，一智能滅萬年愚。莫思向前已過，常思於後，念念圓明，自見本性。善惡雖殊，本性無二。無二之性，名為實性。於實性中，不染善惡，此名圓滿報身佛。

師言：自性起一念惡，報滅萬劫善因。自性起一念善，報得河沙惡盡，直至無上，念念自見，不失本念，名為報身。

【K6】善知識！從法身思量即是化身佛；念念自性自見即是報身佛。自悟自修自性功德，是真自歸依。皮肉是色身，色身是舍宅，不言歸也。但悟自性三身，即識自性大意。

六祖壇經卷上

【六摩訶般若品】

七、說摩訶般若波羅蜜門

【C1”】師言：善知識！既識三身佛了，更為善知識說「摩訶般若波羅蜜法」。各各志心諦聽！

世人終日，口念本體，不識自性，猶如誦食。口但說空，萬劫不得見性。某甲與說：

【C2】善知識！摩訶般若波羅蜜是梵語，此言大智慧到彼岸。此須心行，不在口說。口念心不行，如幻如電。口念心行，即心口相應。本性是佛，離性無別佛。

【C3】何名摩訶？摩訶是大。心量猶如虛空，無有邊畔，亦無方圓大小，非青黃赤白，亦無上下長短，無瞋無喜，無是無非，無善無惡，無有頭尾。諸佛剎土，盡同虛空。世人妙性本空，無一法可得。喻此大空，自性真空，亦復如是。

善知識！今聞某甲說空，便即著空。第一莫空，若空心淨坐，即落無記空，終不成佛法。

善知識！世界虛空，能含萬物色象，日月星宿，山河泉源溪澗，一切樹木，惡人善人，惡法善法，天堂地獄，一切大海，須彌諸山，總在空中。世人性空，亦復如是。

師言：善知識！自性能含萬法是大。萬法在善知識性中。若見一切人，惡之與善，盡皆不捨，亦不染著，心如虛空，名之為大。

善知識！迷人口說，智者心行。又有迷人，空心淨坐，百無所思，自稱為大。此一輩人，不可共說，為邪見故。

善知識！心量廣大，廓周法界，用即了了分明，應用遍知一切。一切是一，一即一切，去來自由，心體無滯，此是{般若}。

善知識！一切般若智心，皆從自性而生，不從外人，莫錯用意，名真自用，一真一切真。

心量大事，不行小道。口莫終日說空，心中不修行此行。恰似凡人自稱國王，終不可得，非吾弟子。

【C4】善知識！何名般若？般若是智慧。一切處所、一切時中，念念不愚，常行智慧，即是般若行。一念愚即般若絕，一念智即般若生。世人愚迷，不見般若。口說般若，心中常愚。自言我修般若，念念說空，不識真空。般若無形相，智慧心即是。若作如是解，即名般若智。

【C5】何名波羅蜜？此是西國語，漢言到彼岸。解義離生滅，著境生滅起。如水有波浪，即是於此岸。觀境無生滅，如水常通流，即名為彼岸，故號波羅蜜。

【C6】善知識！迷人口念。當念之時，有妄有非。念念若行，是名真性。悟此法者，是般若法。修此行者，是般若行。不修即凡，一念修行，法身等佛。

善知識！煩惱即是菩提。前念迷即凡，後念悟即佛。

前念著境即煩惱，後念離境即菩提。

【C7】善知識！摩訶般若波羅蜜，**最尊、最上、最第一**，無住、無往來，三世諸佛皆從中出，用大智慧，打破五蘊煩惱塵勞。

若人修行，定成佛道，變三毒為戒定慧。

【C8】善知識！我此法門從般若生八萬四千智慧。何以故？為世人有八萬四千塵勞；若無塵勞，智慧常在，不離自性。

悟此法者，即是無念、無**憶**、無著、無妄，莫起誑妄，用自真如性，以智慧觀照，於一切法不取、不捨，即是見性成**佛**道。

【C9】善知識！若欲入甚深法界，入般若三昧者，須修般若行，持誦《金剛般若經》，即得見性。當知此功德無量無邊，經中分明讚歎，不能具說。此法門是最上乘，為大智人說，為上根人說。小根小智人聞，心生不信。何以故？

譬如大龍，下雨於閭浮提，漂流棗葉；若雨大海，不增不減。

【C10】若大乘人、若最上乘人，聞說《金剛經》，心開悟解，故知本性自有般若之智，自用智慧常觀照，故不假文字。

譬如雨水，不從天有，元是龍王於江海中，將身攪上，令一切眾生、一切草木、有情無情，悉皆蒙潤，諸水眾流，卻入大海，合為一體。

眾生本性般若之智，亦復如是。

【C11】善知識！小根之人，聞此頓教，猶如草木根性自小，若被大雨，**皆悉**自倒，不能增長。

小根之人，**亦**有般若之智，與大智之人更無差別，因何聞法，亦有悟不悟？緣邪見障重，煩惱根**深**，猶如大雲覆蓋於日，不得風吹，日光不現。般若之智，亦無大小，為一切眾生自心迷悟不同。迷心外見，修行覓佛，未悟自性，即是小根。**若**聞頓教，不執外修，但於自心常起正見，邪見煩惱塵勞常不能**染**，即是見性。善知識！內外不住，去來自由，能除執心，通達無礙，能修此行，與《般若經》本無差別。

【C12】善知識！一切經書及諸文字、大小二乘。十二部經，皆因人置，因智慧性，方能建立。若無世人，一切萬法，本自不有，故知萬法本因人興，一切經書因人說有。緣其人中，有愚有智，愚為小**故**，智為大人。愚者問於智人，智者為愚人說法，令其悟解心開。愚人若悟心開，即與智人無別。

善知識！不悟即佛是眾生；一念悟時，眾生是佛。故知萬法盡在自心，何不從自心中，頓見真如本性。

【C13】《菩薩戒經》云：「我本**元**自性清淨。」識心見性，皆成佛道。「即時豁然，還得本心。」

【C14】善知識！我於忍和尚處一聞，言下便悟，頓見**真如本性**。是以將此教法流行，令學道者頓悟菩提，各自觀心，自見本性。

【C15】若自不悟，須覓大善知識，解最上乘法者，直示正路。是善知識有大因緣，所謂化導，令得見性。一切善法，因善知識能發起故。三世諸佛、十二部經，在人性中本自具有，不能自悟，須求善知識示導方見。若自悟者，不假外善知識。

{若取外求善知識}望得解脫，無有是處。

自心內知識，自悟即是。**自心**若起邪迷，妄念顛倒，外善知識雖有教授，救不可得。自心若正，起般若觀照，一剎那間，妄念俱滅。若識自性，**一悟即至**佛地。

善知識！智慧觀照，內外明徹，識自本心。

若識本心，即**本**解脫，

即是般若三昧，即是無念。

【C16】何名無念？若見一切法，心不染著，是為無念。用即徧一切處，亦不著一切處。但淨本心，使六識從六門走出，於六塵中無染無雜，來去自由，通同無滯，即是般若三昧，自在解脫，名無念行。莫百物不思，當令念絕，即是法縛，即名邊見。

善知識！悟無念法者，萬法盡通。悟無念法者，見諸佛境界。悟無念法者，至佛位地。

【C17】善知識！後代得吾法者，常見吾法身，不離汝左右。善知識！將此頓教法門，同見同行，發願受持，如事佛故，終身受持而不退者，欲入聖位，然須傳授。從上逖來默傳分付，不得匿其正法。

【C18】若不同見同行，在別法中，不得傳付。損彼前人，究竟無益。恐愚不解，謗此法門，百劫千生，斷佛種性。

【L1】善知識！吾有一《無相頌》，汝等誦取，言下令汝迷罪消滅。頌曰：

迷人修福不修道，只言修福便是道。

布施供養福無邊，心中三惡元來造。

擬將修福欲滅罪，後世得福罪還在。

但向心中除罪緣，各自性中真懺悔。

忽悟大乘真懺悔，除邪行正即無罪。

學道常於自性觀，即與諸佛同一例。

五祖唯傳此頓法，普願見性同一體。

若欲當來覓法身，離諸法相心中洗。

努力自見莫悠悠，後念忽絕一世休。

若悟大乘得見性，虔恭合掌志心求。

師言：今於大梵寺中，說此頓教，普願法界眾生，於此言下見性成佛。

【D3】師說法了，韋使君與官僚道俗，一時作禮，無不悟者，皆歎：善哉！何期嶺南有佛出世。

【七功德淨土品】

八、示西方相狀門（武帝問功德附）

【E1】爾時，韋使君再肅容儀，禮拜問曰：「弟子聞和尚說法，實不可思議。今有少疑，欲問和尚，願大慈悲，特為解說。」

師曰：「有疑即問，何須再三。」

使君曰：「和尚所說，可不是達磨大師宗旨？」

師曰：「是。」

【E2】使君曰：「弟子聞說達磨初梁朝武帝問：朕一生逖來，造寺、供僧、布施、設齋，有何功德？達磨言：實無功德。武帝悵快，不稱本情，遂令達磨出境。弟子未達此理，願和尚為說，達磨意旨如何？」

師言：「實無功德，勿疑先聖之言。武帝心邪，不知正法。造寺、供養、布施、設齋，名為求福，不可將福便為功德。功德在法身中，不在修福。」

師言：見性是功，平直是德，念念無滯，常見本性，真實妙用，名為功德。外行禮敬是功，內心謙下是德。自性建立萬法是功，心體離念是德。不離自性是功，應用無染是德。若覓功德法身，但依此作，是真功德。若修功德之人，心即不輕，常行普敬也。」

師曰：「心常輕人，吾我不斷，即自無功。自性虛妄不實，即自無德。無功德之人，為吾我自大，常輕一切故。」

善知識！念念無間是功，心行平直是德。自修身是功，自修性是德。德即不輕，常行普敬。」

韋使君默然作觀。

師言：「善知識！功德須自性內見，不是布施、供養之所求也。是以福德與功德別。武帝不識理，非我祖師有過。」

【E3】使君頂禮，願為弟子，又問：「弟子常見僧俗念《阿彌陀經》，願生西方。請和尚說得生彼不？願為破疑。」

【E4】師言：「使君善聽！某甲與說。世尊在舍衛城中，說西方引化，經文分明，去此不遠。若論相說，里數即有十萬八千。若說身中，十惡八邪便是。說遠只為下根，說近為其上智。人有兩種，法無兩般。迷悟有殊，見有遲疾。迷人念佛生彼，悟人自淨其心，所以佛言：隨其心淨，即佛土淨。」

師言：「東方人但淨心無罪，西方人心不淨有愆。東方人造罪，念佛求生西方。西方人造罪造愆，彼土念生何國？凡愚不了自性，不識身中西方，願東願西。悟人在處一般。所以佛言：隨所住處常安樂。」

使君！心地但無不善，西方去此不遙；若懷不善之心，念佛往生難到。今勸善知識先除十惡，即行十萬。後除八邪，乃過八千。念念見性，常行平直，到如彈指，便覩彌陀。能淨能寂，即是釋迦。心起慈悲，即是觀音。常行喜捨，名為勢至。使君！但行十善，何須更願往生？不斷十惡之心，何佛即來迎請？若悟無生頓法，見西方只在剎那；不悟，念佛欲往，路遙如何得達？」

師言：「某甲與諸人移西方如剎那間，目前便見，願不願？」

【E5】使君頂禮言：「若此處見，何須更願往生？願和尚慈悲，便現西方，普願得見。」

師言：「徒眾用心！一時得見西方，無疑即散。」

【E6】師言：「大眾！世人自色身是城，眼、耳、鼻、舌是城門，外有五門，內有意識。心為地，性是王，王居心地上。性在王在，性去王無。性在身心存，性無身心壞。」

佛向性中作，莫向外求。自性迷即是眾生，離迷即覺，覺即是佛。慈悲即是觀音，喜捨名為勢至，能淨即釋迦，平直即彌陀。

人我是須彌，邪心是海水，煩惱是波浪，毒害是惡龍，虛妄是鬼神，塵勞是魚鼈，貪瞋是地獄，愚癡是畜生。

善知識！常行十善，天堂便至。除人我，須彌倒。無邪心，海水竭。煩惱無，波浪滅。毒害除，魚鼈絕。

自心地上，覺性如來放大光明，外照六門清淨，照破六欲諸天。內照三毒若除，地獄一時消散。內外明徹，不異西方。不作此修，如何到彼？」

大眾聞說，俱歎善哉！但是迷人，了然見性，悉皆禮拜，唯言：「善哉！普願法界眾生，聞者一時悟解。」

【E7】師言：「善知識！若欲修行，在家亦得，不由在寺。在家能修，如東方人心善。在寺不修，如西方人心惡。但心清淨，即是自性西方。」

【E8】使君又問：「在家如何修行？願為教授。」

【E9】師言：「吾與大眾作《無相頌》，但依此修，常與吾同處無別。若不依此修行，雖在吾邊，如隔千里。」頌曰：

說通及心通，如日處虛空，唯傳見性法，出世破邪宗。

法即無頓漸，迷悟有遲疾，只這見性法，愚人不可悉。

說即雖萬般，合理還歸一，煩惱暗宅中，常須生慧日。

邪來煩惱至，正來煩惱除，邪正俱不用，清淨至無餘。
菩提本自性，起心即是妄，淨性在妄中，但正無三障。
世人若修道，一切盡不妨，常自見己過，與道即相當。
色類自有道，各自不相妨，離道別覓道，覓道不見道。
欲得見真道，行正則是道，自若無道心，闍行不見道。
若真修道人，不見世間過，若見他人非，自非卻在左。
他非我不非，我非自有過，但自却非心，打除煩惱破。
欲擬化他人，自須有方便，勿令彼有疑，即是自性見。
法元在世間，於世出世間，一切盡打却，菩提性宛然。

【F1】師言：「善知識！總須誦取，依此偈修，言下見性，雖去吾千里，如常在吾邊；於此言下不悟，即對面千里。各各自修，法不相待。眾人且散，吾歸曹溪山。眾若有疑，却來相問，為眾破疑，同見佛性。」

【F2】時，在會道俗豁然大悟，咸讚善哉！俱明佛性。

【八參請機緣品】

九、諸宗難問門

【1a】大師出世，行化四十餘年。

諸宗難問，僧俗約千餘人，皆起惡心，欲相難問。

師言：一切盡除，無名可名，名於自性。無二之性，是名實性。於實性上，建立一切教門，言下便須自見。

諸人聞說，總皆頂禮，請事為師，願為弟子。如此之徒，說不可盡。

若論宗旨，傳授《壇經》者，即有稟承，所付須知去處、年月、時代、姓名，遞相付囑。

若無《壇經》稟承者，即非南宗弟子，緣未得所稟，雖說頓法，未契本心，終不免諍。

但得法者，只勸修行。諍是勝負之心，與道相違矣。

十、南北二宗見性門

【1b】世人盡言南能北秀，未知事由。

且秀大師在荊南府當陽縣玉泉寺住。

能大師在韶州城東四十五里曹溪山住。

法本一宗，人有南北。何名頓漸？法即一種，見有遲疾。法無頓漸，人有利鈍，故名頓漸。

【1c】秀聞師說法徑疾，直指見性。

遂命門人志誠曰：「汝聰明多智，可與吾到曹溪山禮拜。但坐聽法，莫言吾使汝去。汝若聽得，盡心記取，却來與說。吾看彼所見，誰遲誰疾？火急早來，勿令吾怪。」

【1d】志誠唱諾，禮拜便行，經二十五日至曹溪山，禮師坐聽，不言來處。

【1e】志誠一聞，言下便悟，即起禮拜，白言：和尚！弟子在玉泉秀和尚處，學道九年，不得契悟。今聞和尚一說，忽然悟解，便契本心。和尚慈悲！弟子生死事大，又恐輪迴，願當教示。

【1f】師曰：汝從玉泉來，應是細作。

對曰：不是。

師曰：何得不是？

對曰：未說即是，說了不是。

師曰：煩惱菩提，亦復如此。

【1g】師問志誠曰：吾聞汝禪師教示學人，唯傳戒定慧，未審汝師說戒定慧，行相如何？與吾說看。

【1h】志誠曰：秀和尚說，諸惡不作名為戒，諸善奉行名為慧，自淨其意名為定，此是戒定慧。彼說如此，未審和尚所見如何？願為解說。

【1i】師曰：秀和尚所見，實不可思議。吾所見戒定慧又別。

【1j】志誠啟和尚：戒定慧只合一種，如何更別？

【1k】師曰：汝師說戒定慧，接大乘人。吾戒定慧，接最上乘人。悟解不同，見有遲疾。

汝聽吾說，與彼同不？吾所說法，不離自性；離體說法，自性常迷。須知一切萬法，皆從自性起用，是真戒定慧等法。

常見自性自心，即是自性等佛。

師曰：志誠！聽吾說：

心地無非自性戒，心地無癡自性慧，心地無亂自性定。

【1l】師言：汝師戒定慧，勸小根人。吾戒定慧，勸大智根人。

若悟自性，亦不立菩提涅槃，亦不立解脫知見。無一法可得，方能建立萬法，是真見性。若解此意，亦名佛身，亦名菩提涅槃，亦名解脫知見，亦名十方國土，亦名恒河沙數，亦名三千大千，亦名大小藏十二部經。見性之人，立亦得，不立亦得，去來自由，無滯無礙，應用隨作，應語隨答，普見化身，不離自性，即得自在神通、游戲三昧之力，此名見性。

【1m】志誠再啟：和尚！如何是立不立義？

【1n】師曰：自性無非、無癡、無亂，念念般若觀照，常離法相，自由自在，縱橫盡得，有何可立？自性自悟，頓悟頓修，亦無漸次，所以能立一切法，佛言寂滅，有何漸次？

【1o】志誠禮拜，便住曹溪，願為門人，不離左右。

【2a】復有一僧，名曰法達。常誦《法華經》七年，心迷不悟正法，來詣曹溪，禮拜問曰：弟子誦《法華經》，心常有疑，又不知正法之處。和尚智慧廣大，願為決疑。

【2b】師曰：法達！法即甚達，汝心不達。經上無疑，汝心自疑。汝心邪而求正法。吾心正則是持經。吾不識文字，汝取經來誦，誦之一遍，吾聞即知。

法達取經，便誦一遍。師知佛意，乃與說經。

【2c】師言：法達！經無多語，七卷盡是譬喻因緣。如來廣說三乘，只為世人根鈍。經文分明，無有餘乘，唯一佛乘。

汝聽一佛乘，莫求二乘，迷却汝性。且經中何處是一佛乘？吾聞汝誦經云：諸佛世尊，唯以一大事因緣故，出現於世（正法有一十六字）。此法如何解？如何修？汝用心聽，吾為汝說。

師言：法達！人心不思，本來寂靜，離却邪見，即大事因緣。內外不迷即離兩邊。外迷著相，內迷著空。於相離相，於空離空，即是不迷。若悟此法，一念心開，出現於世。心開何事？開佛知見。佛猶覺也，分為四門：開覺知見、示覺知見、悟覺知見、入覺知見。此名開示悟入。從上一處入，即覺知見，見自本性，即得出現。

師言：吾勸一切人，於自心地，常開佛知見。

世人心邪，愚迷造罪，口善心惡，貪瞋、嫉妬、讒佞、侵害，自開眾生知見。

世人心正，常起智慧觀照，自心止惡行善，自開佛知見。汝須念念開佛知見，莫開眾生知見，開佛知見即見出世。

師言：法達！此是《法華經》一乘義，向下分之為三乘者，蓋為迷人故，汝但依一佛乘。

【2d】師言：法達！心行轉《法華》，不行《法華》轉。心正轉《法華》，心邪《法華》轉。開佛知見轉《法華》。

努力依法修行，即是轉經。自心若不念念修行，即常被經轉。

【2e】法達一聞，言下大悟，涕淚悲泣，白大師言：實未曾轉《法華》，七年被《法華》轉。念念願修佛行。

師言：行佛行，是佛。

其在會者，各得見性。

【3a】復有僧，名曰智常。

【3b】禮拜問四乘義，啟和尚：佛說三乘法，又言最上乘。弟子不解，願為教授。

【3c】師曰：汝向自心見，莫著外法相，法無四乘，人心自有四等。見聞轉讀是小乘，悟法解義是中乘，依法修行是大乘。萬法盡通，萬行俱備，一切不染，離諸法相，作無所得，名最上乘。乘是行義，不在口誦，汝須自修，莫問吾也。一切時中，自性自知，是四乘義。

【4a】又玉泉寺有一童子，年十三歲，南陽縣人，名曰神會。

【4b】禮師三拜，問曰：和尚坐禪，還見不見？

師以拄杖打三下，却問：吾打汝，還痛不痛？

對云：亦痛亦不痛。

師曰：吾亦見亦不見。

神會問：如何是亦見亦不見？

師曰：吾之所見，常見自心過愆，不見他人是非好惡，所以亦見亦不見。汝言亦痛亦不痛如何？汝若不痛，同其木石；若痛，即同凡夫，應生瞋恨。

師言：神會小兒向前，見不見是二邊；痛不痛屬生滅。汝自性且不見，敢來弄人！神會禮拜悔謝，更不敢言。

【4c】師曰：汝心迷不見，問善知識覓路。汝心悟即自見性，依法修行。汝迷不見自心，却來問吾見與不見？吾見自知，代汝迷不得。汝若自見，不代吾迷。何不自知見，問吾見不見？

【4d】神會禮經百拜，求謝愆過，請事為師，不離左右。

【九法門對示品】

十一、教示十僧傳法門（滅度年月附）

【1a】爾時，師喚門人法海、志誠、法達、神會、智常、智通、志徹、志道、法珍、法如等，報言：吾滅度後，凡為人師，改易者多。汝等十人向前，汝等不同餘人，吾滅度後，各為一方師。

【1b】吾今教汝諸法，不失本宗。先須舉三科法門，動用三十六對，出沒即離兩邊，說一切法，莫離自性。

忽有人問，出語盡雙，皆取對法。來去相因，究竟二法盡除，更無去處。

【1c】三科者，陰、界、入。

五陰者，色、受、想、行、識。

十二入者，外六塵，內六門。

六塵者：色、聲、香、味、觸、法。

六門者，眼、耳、鼻、舌、身、意，各有一識。

十八界者，六塵、六門、六識為之十八。

自性含萬法，名含藏識。若起思量，即是轉識。轉識生六識，出六門，見六塵，三十六。

由自性用。

自性邪，起十八邪。自性正，起十八正。

惡用即眾生；善用即是佛。

用由何等？由自性對。

解用即通一切法，自身是佛。

【1d】外境無情五對：天地對，陰陽對，日月對，明暗對，水火對。

法相語言十二對：語法對，有為無為對，有色無色對，有漏無漏對，色空對，動靜對，清濁對，有相無相對，凡聖對，僧俗對，老少對，大小對。

自性起用十九對：長短對，邪正對，亂定對，戒非對，直曲對，癡慧對，愚智對，慈毒對，實虛對，險平對，煩惱菩提對，悲苦對，瞋喜對，捨慳對，進退對，生滅對，常無常對，法身色身對，化身報身對。

都三十六對。

【1e】師言：此是三十六對法，若解用即通貫一切經，出入即離兩邊。

自性動用，共人言語，外於相離相，內於空離空。若執全空，唯長無明。

又却謗經，言『不用文字』。

師曰：說法之人，口云不用文字。世人道者，盡不合言。正語之時，即是文字。文字上說空，本性不空，即是文字。

文字無邪正，{卻}直道：『不立文字』。

只這不立兩字，即是文字。見人所說，便即謗他言著文字。

汝等須知，自迷猶可，又謗佛經。不要謗經，罪障無數。著相於外而求真，或廣立道場，說有無之過患。如是之人，累劫不可見性，不勸依法修行，但只聽說修行。

莫百物不思，於道自生質礙。若聽說不修，令人返生邪念，但能依法修行，常行無相法施。

師言：汝等若悟，依此說，依此用，依此行，依此作，即不失本宗。

若有人問汝義，問有將無答，問無將有答，問凡以聖對，問聖以凡對，問一邊將二邊對，二法相因，生中道義。教汝一問，餘問一依此作，三十六對法，即不失理也。

吾今教汝一答。人問何名為暗？答云：明是因暗，即緣暗有明，明沒即暗。以明顯暗，以暗現明，來去相因，成中道義。餘問悉皆如此。

【1f】師教十僧已，報言：於後傳法，遞相教授《壇經》，即不失宗旨。汝今得了，遞代流行。後人得遇《壇經》，如親見吾。

教示十僧：汝等抄取，代代流行。

若看《壇經》，必當見性。

【十付囑流通品】

【2a】大師先天元年，於新州國恩寺造塔，至二年七月八日，喚門人告別。

師言：汝等近前，吾至八月欲離世間。汝等有疑，早須相問，為汝破疑，當令迷盡，使汝安樂。吾若去後，無人教汝。

法海等聞，悉皆涕泣。唯有神會，不動神情，亦無涕泣。

【2b】師曰：神會小師却善不善等，毀譽不動。餘者空得數年在山，修行何道？汝今悲泣，為憂阿誰？若憂不知去處，吾自知去處。吾若不知去處，終不別汝等。汝等悲泣，為不知吾去處。知吾去處，不合悲泣。法性體無生滅去來。

汝等盡坐，吾與汝等一偈，名曰《真假動靜》。汝等誦取此偈，與吾意同，依此修行，不失宗旨。

眾僧作禮，請師說偈。

【2c】偈曰：

一切無有真，不以見於真，若見於真者，是見盡非真。
若能自有真，離假即非真，自心不離假，無真何處真。
有情即解動，無情即不動，若修不動行，同無情不動。
若覓真不動，動上有不動，不動是不動，無情無佛種。
能善分別相，第一義不動，但作如是見，即是真如用。
報諸學道人，努力自用意，莫於大乘門，卻執生死智。
若言下相應，即共論佛義，若實不相應，合掌令歡喜。
此宗本無諍，諍即失道意，執迷諍法門，自性入生死。
時，眾僧聞知大師意，更不敢諍，各自攝心，依法修行，一時禮拜，即知大師不久住世。

【3a】法海上座問曰：和尚去後，衣法當付何人？

師言：吾於大梵寺說法，直至今日，抄錄流行，名《法寶記》，汝等守護，度諸群生，但依此說，是真正法。

師言：法海向前！吾滅度後，二十年間，邪法繚亂，惑我正宗。有一南陽縣人出來，不惜身命，定於佛法，豎立宗旨，即是吾法弘於河洛，此教大行。

【3b】師言：汝今須知，衣不合傳。汝若不信，吾與汝說先聖達磨大師傳衣偈，據此偈意，衣不合傳，汝聽！偈曰：

吾本來東土，說法救迷情，一花開五葉，結果自然成。

師曰：吾有一偈，用先聖大師偈意：

心地含種性，法雨即花生，頓悟花情已，菩提果自成。

師說偈已，令門人散。

眾相謂曰：「大師多不久住世間。」

【4a】師至先天二年八月三日，食後報言：汝等各著位坐，今共汝別。

【4b】時法海問言：此法從上至今傳幾代？願和尚說。

【4c】師曰：初六佛、釋迦第七、迦葉、阿難、末田地、商那和修、優波掬多、提多迦、佛陁難提、伏駄蜜多、脇尊者、富那夜奢、馬鳴、毗羅尊者、龍樹、迦那提多、羅睺羅多、僧伽那多、僧伽耶舍、鳩摩羅駄、闍那多、波修槃頭、摩拏羅、鶴勒那、師子比丘、舍那婆斯、優波掘多、婆須蜜多、僧伽羅叉、菩提達磨、北齊慧可、唐僧璨、唐道信、唐弘忍、吾今惠能。

師曰：吾今付法於汝，汝等於後遞相傳授，須有稟承依約，莫失宗旨。

【4d】法海白言：和尚留何教法，令後代迷人，得見自性？

【4e】師言：汝聽！後代迷人，若識眾生，即見佛性，若不識眾生，萬劫覓佛難逢。吾今教汝識自心眾生，見自心佛性。汝志心聽！吾與汝說。後代之人，欲求見佛，但識眾生。

師曰：只為眾生迷佛，非是佛迷眾生。

自性若悟，眾生是佛。自性若迷，佛是眾生。

自性平直，眾生是佛。自性邪險，佛是眾生。

師言：法海！汝等心若險曲，即佛在眾生中。

一念平直用心，即是眾生成佛。

我心自有佛，自若無佛心，何處求真佛？

【4f】吾今留一偈，與汝等別，名《自性真佛偈》。後代迷人，識此偈意，自正本心，**自成佛道**。

偈曰：

真如性淨是真佛，邪見三毒是魔王，
邪迷之時魔在舍，正見之時佛在堂。
性中邪見三毒生，即是魔王**來**住舍，
正見自除三毒心，魔變成佛真無假。
法身報身及化身，三身本來是一身，
若向性中能自見，即是成佛菩提因。
從本化身生淨性，**淨**性常在化身中，
性使化身行正道，當來**性智**更無窮。
姪性本是淨性因，除姪即無淨性身，
性中各自離五欲，見性剎那即是真。
今生若悟頓法門，忽**見**自性**現**世尊，
汝等修行覓作佛，**自性自見正中真**。
若能心中**自見**真，有真即是成佛因，
不見自性外覓佛，起心總是大癡人。
頓教法門今已留，救度世人須自修，
報汝當來學道者，不作此見大悠悠。

【4g】師說偈了，報言：今共汝別，吾滅度後，莫作世情，悲泣雨淚，受人弔問。身著孝服，非吾弟子，亦非正法。

但如吾在日，一時盡坐，無動無靜，無生無滅，無去無來，無是無非，無住無往，無名無字。恐**汝**心迷，不會吾意，吾今再囑，令汝見性。

吾滅度後，依此修行，如吾在日。汝等違法，縱吾在世，終無有益。

大師言訖，夜至三更，奄然遷化。大師春秋七十有六。

師遷化日，寺內異香氛氲，經于七日，感得山崩地動，**草**木變白，日月無光，天地失色，群鹿**鳴叫**，至夜不絕。先天二年八月三日，夜三更時，於新州國恩寺圓寂。餘在功德塔記具述。

【5a】至十一月，韶廣二州門人，迎師神座，向曹溪山葬。忽於龕內白光出現，直上衝天，三日始散。韶州奏聞，奉敕立碑供養。

【5b】洎乎法海上座無常，以此《壇經》付囑志道，志道付彼岸，彼岸付悟真，悟真付圓會。遞代相傳付囑。

一切萬法，不離自性中見也。

六祖壇經卷下

【附記】

此《壇經》經文前有惠昕的〈韶州曹溪山六祖壇經序〉。